

Shona - MuMweya MuHondo Nhanganyaya MuMagwaro - SW Intro Scriptures

Ruka 17:5 Vapostori vakati kuna She, “Tiwedzereiwo kutenda kwedu!”

VaRoma 10:17 Naizvozvo, kutenda kunouya nokunzwa, uye kunzwa neshoko raKristu.

Ruka 11:1 Mumwe musi Jesu akanga achinyengetera ari pane imwe nzvimbo.

Akati apedza, mumwe wavadzidzi vake akati kwaari, “Ishe, tidzidzisei kunyengetera, saJohani akadzidzisa vadzidzi vake.”

1 Timoti 2:1-4 Naizvozvo, pakutanga kwezvose, ndinokurayirai kuti vanhu vose vakumbirirwe, vanyengetererwe, varevererwe, vavongerwe, 2 madzimambo uye navose vari vakuru, kuti tigare norugare uye norunyararo pakurarama muumwari hwose nomuutsvene. 3 Izvi zvakanaka uye zvinofadza Mwari muponesi wedu. 4 Anoda kuti vanhu vose vaponeswe uye kuti vazine chokwadi.

Zekaria 3:1,2 Ipapo akandiratidza Joshua muprista mukuru amire pamberi pomutumwa waJehovha, uye Satani amire kurudyi rwake kuti amupomere. 2 Jehovha akati kuna Satani, “Jehovha ngaakutuke iwe, Satani! Jehovha, iye akasarudza Jerusarema, ngaakutuke! Ko, murume uyu haazi rukuni runobvira rwabvutwa mumoto here?”

VaEfeso 6:12 Nokuti hatirwi nenyama neropa, asi navabati, navanesimba, namasimba enyika ino yerima uye namasimba emweya yakaipa ari muchadenga.

VaEfeso 6:10,11 Pakupedzisira, ivai nesimba muna She nomusimba rake guru. 11 Shongai nhumbi dzose dzokurwa nadzo dzaMwari kuti mugogona kumira muchirwa namano adhiabgori.

VaEfeso 6:13-17 Naizvozvo shongai nhumbi dzose dzokurwa nadzo dzaMwari, kuti panosvika zuva rakaipa, mugokwanisa kumira, uye mushure mokunge maita zvinhu zvose, kuti mumire. 14 Zvino mirai nesimba, makasunga bhanhire rechokwadi muchiuno chenu, nechidzitiro chechipfuva chokurarama, 15 uye tsoka dzenyu dzakashongedzwa negadziriro inobva pavhangeri rorugare. 16 Pamusoro paizvozvi zvose, torai nhoo yokutenda, iyo yamunogona kudzima nayo miseve inopfuta yowakaipa. 17 Torai ngowani yoruponeso nomunondo womweya, iro shoko raMwari.

VaHebheru 4:12 Nokuti shoko raMwari ibenyu uye rine simba. Rinopinza kukunda munondo unocheka kumativi maviri, rinobaya kunyange kusvikira panoparatzana mwoyo nomweya, namafundo nomongo; rinotonga mifungo nendangariro dzomwoyo.

Ruka 4:8 Jesu akapindura akati, “Kwakanyorwa kuchinzi, ‘Namata Ishe

Mwari wako umushumire iye oga.' "

VaEfeso 6:18 Uye munyengetere muMweya nguva dzose nemhando dzose dzeminyenetero nemikumbiro. Muine izvi mupfungwa dzenyu, murinde uye murambe muchinyeneterera vatsvene.

1 Samueri 17:45-47 Dhavhidhi akati kumuFiristia, "Iwe unouya kwandiri nomunondo, nepfumo uye nepfumo guru, asi ini ndinouya kwauri muzita rajehovha Wamasimba Ose, Mwari wehondo dzavalsraeri, uyo waunozvidza. 46 Nhasi Jehovha achakuisa muruoko rwangu, uye ndichakuraya ndigokugura musoro wako. Nhasi ndichapa mitumbi yehondo yavaFiristia kushiri dzedenga nokuzvikara zvenyika, uye nyika yose ichaziva kuti mulusraeri muna Mwari. 47 Vose vakaungana pano vachaziva kuti Jehovha haaponesi nomunondo kana nepfumo; nokuti kurwa ndokwajehovha, uye achaisa imi mose mumaoko edu."

Ruka 10:17-20 Vana makumi manomwe vakadzoka nomufaro vakati, "Ishe, kunyange madhimoni anozviisa pasi pedu muzita renyu." 18 Akati kwavari, "Ndakaona Satani achiwa kubva kudenga semheni. 19 Ndakupai simba rokuti mutsike pamusoro penyoka nezvinyavada uye kuti mukunde simba rose romuvengi; hakuna chichakukuvadzai. 20 Kunyange zvakadaro hazvo, musafara nokuti mweya yakaipa inozviisa pasi penyu, asi farai kuti mazita enyu akanyorwa kudenga."

2 VaKorinde 10:3-5 Nokuti kunyange dai tichigara zvedu munyika, hatirwi hondo sezvinoita nyika ino. 4 Nhumbi dzatinorwa nadzo hadzizi nhumbi dzenyika ino. Asi dzine simba raMwari rokuputsa nhare. 5 Tinoputsa kukakavara nokunyengera kwose kunozvikudza kuchipikisa kuziva Mwari, uye tinotapa mifungo yose kuti iteerere Kristu.

Mateo 16:19 Ndichakupa kiyi dzoumambo hwokudenga; chose chaunosunga pano pasi chichasungwa kudenga, uye chose chaunosunungura pano pasi nokudenga chichasunungurwa."

2 Timoti 1:7 Nokuti Mwari haana kutipa mweya wokutya, asi mweya wesimba, noworudo nowokuzvidzora.

Mateo 12:28,29 Asi kana ndichibudisa madhimoni noMweya waMwari ipapo umambo hwaMwari hwasvika kwamuri. 29 "Uyezve, munhu angapinda sei mumba momunhu ane simba uye agoenda nezvinhu zvake asina kutanga asunga munhu uyu ane simba? Ipapo anogona kuzopamba imba yake.

VaEfeso 1:13 Nemi makaiswawo muna Kristu pamakanza shoko rechokwadi, iro vhangeri rokuponeswa kwenyu. Makati matenda, makaiswa rupau maari nechisimbiso, icho chivimbiso choMweya Mutsvene,

Mabasa aVapostori 19:6 Pauro akati aisa maoko ake pamusoro pavo, Mweya Mutsvene wakauya pamusoro pavo, uye vakataura nendimi vakaprofita.

Mako 16:15-18 Akati kwavari, “Endai munyika yose muparidze vhangeri kuzvisikwa zvose. 16 Ani naani anotenda uye akabhabhatidzwa achaponeswa, asi asingatendi achatongwa. 17 Uye zviratidzo izvi zvichatevera vanotenda: Vachadzinga mweya yakaipa muzita rangu, vachataura nendimi itsva; 18 vachabata nyoka namaoko avo, uye kunyange vakanwa muchetura unouraya haungavakuvadzi napaduku; vachaisa maoko avo pamusoro pavarwere, uye vachapora.”

1 Johani 1:9 Kana tichireurura zvivi zvedu, iye akatendeka uye akarurama, uye achatikanganwira zvivi zvedu agotinatsa pakusururama kwose.

Ekisodho 20:5 Usazvipfugamira kana kuzvinamata, nokuti ini Jehovha Mwari wako, ndiri Mwari ane godo, ndinoranga vana nokuda kwechivi chamadzibaba kusvikira kurudzi rwechitatu norwechina rwaavo vanondivenga,

MaPisarema 109:17 Aifarira kutaura chituko, ngachichiuya pamusoro pake; iye asina kufadzwa nokuropafadza, ngakuve kure naye.

Vatongi 16:16 Pakupedzisira mushure mokunge atambudzwa namashoko ake, zuva nezuva, achimugombedzera, akaneta zvokusvika parufu.

VaEfeso 4:26 “Mukutsamwa kwenyu, musatadza.” Musarega zuva richivira muchaka-ngotsamwa,

VaRoma 14:12 Saka, naizvozvo mumwe nomumwe wedu achazvidavirira kuna Mwari.

1 Johani 2:23 Hakuna munhu anoramba Mwanakomana angava naBaba; ani naani anopupura Mwanakomana ndiyе ana Babawo.

Johani 14:6 Jesu akapindura akati, “Ndini nzira nechokwadi uye noupenyu. Hakuna munhu angaya kuna Baba kana asina kupfuura napandiri.

Mateo 11:28-30 “Uyai kwandiri, imi mose makaneta makaremerwa, uye ndichakupai zororo. 29 Takurai joko rangu, mudzidze kwandiri, nokuti ndiri munyoro uye ndine mwoyo unoziwinipisa, uye muchawana zororo remweya yenyu. 30 Nokuti joko rangu hariremi uye mutoro wangu wakareruka.”

2 VaKorinde 6:2 Nokuti iye anoti, “Ndakakunzwa panguva yenyasha dzangu, uye pazuva roruponeso ndakakubatsira.” Ndinokuudzai, zvino nguva yenyasha dzaMwari, zvino ndiyo nguva yoruponeso.

VaRoma 10:13 “nokuti ani naani anodana kuzita raShe achaponeswa.”